



## ICC-mit tusagassiorfinnut nalunaarut

9. november 2017

### Pisuussutininik uumassusilinnik piujuaannartitsineq toqqammavigalugu atuinissami akaareqatigiinneq

Inuit Alaska-meersut, Canada-meersut, nunatsinneersut Rusland-imilu Tjukotka-meersut ulluni pingasuni Ottawa-mi ataatsimeeqatigiinnertik 8. november naammasseqqammerpaat, tassanilu kulturikkut piujuaannartitsineq, nerisassaqaqarnermik qulakkeerinnineq, eqqissisimatitsineq atuinerlu oqaluuserineqarput.

Ataatsimiinnermi Inuit kulturikkut pisinnaatitaaffiisa siuarsarnissaat, tassungalu ilaatillugu piujuaannartitsineq toqqammavigalugu pisuussutininik uumassusilinnik atuisinnaanermut pisinnaatitaaffik siunertaralugit Issittumi killeqarfiit akimorlugit suleqatigiinnissamik naggueqatigiinnillu Inunnik akaarinnissamik kajumissaarisooqarpoq.

Ilanngullugulu Issittumi nunat immikkoortui allat Inuttulli assigiimmik pisussaaffeqarnissaannik kajumissaarisooqarpoq, taamatullu killeqarfiit aporfinginagit Issittoq kaajallallugu pisuussutininik pineqartunik aqutsinissamut alloriarnissat piviusunngorteqquneqarlutik.

Duane Smith, Inuvialuit Regional Corporation-imi siulittaasoq, naapertorlugu pisuussutininik uumassusilinnik atuinissamut pisinnaatitaaffik Nunat Inoqqaavisa Pisinnaatitaaffii pillugit Naalagaaffiit Peqatigiit Nalunaarutaani 2007-meersumi aalajangersagaareerpoq. *"Inuit tassaapput inuiaat nunani sisamani assigiinngitsumik naalakkersuinikkut ingerlatsiviusuni misilittagaqartuusunilu najugaqartuusut. Taamaammallu akunnitsinni ikorfartogitigiissinnaallutalu ilisimasatsinnik akunnitsinnit ilinniagaqarsinnaavugut"*.

ICC Alaskami siulittaasoq Jimmy Stotts ima oqarpoq:

*"Pisuussutininik uumassusilinnik atuinissatsinnik pisinnaatitaaffik nerisassaqaqarnitsinnut qulakkeerinninnermut toqqammaviuvoq. Taamaattuarsimavoq, tamannalu ilungersuutigiuassavarput"*.

Aalisarnermut Piniarnermullu Naalakkersuisooqarfimmi (APN) allaffimmi pisortaq Amalie Jessen ima oqarpoq:

*"Sumiiffinni, nunat iluini, nunat immikkoortuini, Issittumi nunat akornanni nunallu tamalaat akornanni Inuit piniarnermut pisinnaatitaaffiisa siuarsarnissaat sukaternissaallu siunertaralugu Inuit sutigut tamatigut suleqatigiinnissaat pisariaqarluinnarpoq. Taamaaliortoqanngippat Inuit siunissami pisuussutiminnik uumassusilinnik atuisinnaanissaminnut periarfissaarutissapput"*.

ICC-p Nunatsinni siulittaasua Hjalmar Dahl ataatsimeeqatigiinneq pillugu naliliigami ima oqarpoq:

*"Isumaqarpunga pisuussutininik uumassusilinnik naggueqatigiit Inuit ulluni arlalinni oqaloqatigiillutik ataatsimeeqatigiinnerat imaanaanngitsuusoq. Siunissatsinnut qiviarluta suli annertunerusumik suleqatigiinnissarput ataatsimeeqatigiinnermi qitiuvoq, taamaalillutalu aappaagu julip 16-anniit 19-at ilanngullugu ICC-p Ataatsimeersuarnissaani oqaloqatigeeqqissatsinnut pitsassuarnik toqqammavissaqaleratta nuannaarutigaaara."*



Ataatsimiinneq 2014-imi ICC-p Ataatsimeersuarnerani Kitingaaryuinit Nalunaarummi pisuussutit uumassusillit pillugit ataatsimeersuartitsinissamik kissaatigineqartoq taamaalilluni naammassineqarpoq.